



# education

Department:  
Education  
REPUBLIC OF SOUTH AFRICA

## NATIONAL SENIOR CERTIFICATE

IBANGA 12

XHOHL.2

ISIXHOSA ULWIMI LWASEKHAYA (HL)

IPHEPHA LESIBINI (P2)

FEBRUWARI/MATSHI 2010

AMANQAKU: 80

IXESHA: 2½ iiyure

Olu viwo lunamaphepha angama-23.

# MORNING SESSION



**IMIYALELO NENGACISO**

1. Nceda ufunde le miyalelo ngocoselelo phambi kokuba uqale ukuphendula imibuzo.
2. Musa ukuzama ukufunda lonke iphepha. Jonga kwisiqulelatho esikwiphepha elilandelayo uze uchonge imibuzo ebuzwe ngeetekisi ozifundisiweyo kulo nyaka. Emva koko yifunde le mibuzo uze ukhethe leyo unqwenela ukuyiphendula.
3. Eli phepha linamacandelo amaTHATHU:  
  
ICANDELO A: Isihobe (30)  
ICANDELO B: Inoveli (25)  
ICANDELO C: Idrama (25)
4. Landela imiyalelo esekuqaleni kwicandelo ngalinye ngocoselelo.
5. Kulindeleke ukuba uphendule IMIBUZO EMIHLANU iyonke:  
  
Imibuzo emithathu KWICANDELO A; omnye KWICANDELO B nomnye KWICANDELO C. Sebenzisa uluhlu lokukhangela (itshekhlisti) olukwiphepha lesine lokukunceda.
6. Nombola iimpendulo zakho ngokwendlela ekunonjolwe ngayo imibuzo kwiphepha lemibuzo.
7. Qala icandelo NGALINYE kwiphepha ELITSHA.
8. Bhala ngokucocekileyo nangokucacileyo.
9. Yaba ixesha lakho ngolu hlobo:  
  
ICANDELO A: Malunga nama-40 emizuzu  
ICANDELO B: Malunga nama-55 emizuzu  
ICANDELO C: Malunga nama-55 emizuzu

**IPHEPHA LESIQULATHO:**

Eli phepha liza kunceda abafundi bakwazi ukukhetha imibuzo abafuna ukuyiphendula ngaphandle kokufunda lonke iphepha.

<b>ICANDELO A: ISIHOBE</b>		
<b>Imibongo emiselweyo: Phendula NAYIPHI NA imibuzo emiBINI.</b>		
<b>INANI LOMBUZO</b>	<b>UMBUZO</b>	<b>AMANQAKU</b>
1 ( <i>A! Zilimbola</i> )	Umbuzo omde	10
<b>OKANYE</b>		
2 ( <i>Indoda yomXhosa</i> )	Umbuzo omfutshane	10
<b>OKANYE</b>		
3 ( <i>Ukhanyo</i> )	Umbuzo omfutshane	10
<b>OKANYE</b>		
4 ( <i>Imfundo</i> )	Umbuzo omfutshane	10
<b>KUNYE</b>		
<b><i>Umbongo ongamiselwanga: Phendula nawuphi umbuzo omNYE.</i></b>		
5 ( <i>A-a! Xolilizwe</i> )	Umbuzo omde	10
<b>OKANYE</b>		
6 ( <i>Ithemba</i> )	Umbuzo omfutshane	10
<b>ICANDELO B: INOVELI</b>		
<b>Phendula umbuzo omNYE.*</b>		
7 ( <i>Nyana Wam! Nyana Wam!</i> )	Umbuzo omde	25
<b>OKANYE</b>		
8 ( <i>Nyana Wam! Nyana Wam!</i> )	Umbuzo omfutshane	25
<b>OKANYE</b>		
9 ( <i>Ukhozi Olumaphiko</i> )	Umbuzo omde	25
<b>OKANYE</b>		
10 ( <i>Ukhozi Olumaphiko</i> )	Umbuzo omfutshane	25
<b>OKANYE</b>		
<b>ICANDELO C: IDRAMA</b>		
<b>Phendula umbuzo omNYE.*</b>		
11 ( <i>Amaza</i> )	Umbuzo omde	25
<b>OKANYE</b>		
12 ( <i>Amaza</i> )	Umbuzo omfutshane	25
<b>OKANYE</b>		
13 ( <i>A-a-a! Jongumsobomvu!</i> )	Umbuzo omde	25
<b>OKANYE</b>		
14 ( <i>A-a-a! Jongumsobomvu!</i> )	Umbuzo omfutshane	25

**QAPHELA: KUMACANDELO B no-C, phendula umbuzo OMDE OMNYE nombuzo OMFUTSHANE OMNYE.**



**ULUHLU LOKUKHANGELA (ITSHEKHLISTI)**

Kunyanzelekile ukuba uqwalasele olu luhlu lulandelayo ukuze uqinisekise ukuba ukhethe imibuzo ngendlela eyiyo.

<b>ICANDELO</b>	<b>AMANANI EMIBUZO</b>	<b>INANI LEMIBUZO EPHENDULWAYO</b>	<b>TIKISHA NGASEZANTSI</b>
A: Isihobe (Imibongo emiselweyo)	1 – 4	2	
A: Isihobe (Umbongo ongamiselwanga)	5 – 6	1	
B: Inoveli (Umbuzo omde OKANYE umbuzo omfutshane)	7 – 10	1	
C: Idrama (Umbuzo omde OKANYE umbuzo omfutshane)	11 – 14	1	

**QAPHELA: KUMACANDELO B no-C, phendula umbuzo OMDE UBE MNYE nombuzo OMFUTSHANE OMNYE.**

**ICANDELO A: ISIHOBE****VUKANI MADODA KUSILE****IMIBONGO EMISELWEYO****IMIYALELO**

- Kweli candelo kubuzwe imibongo nezibongo eziNE ezimiselweyo neziBINI ezingamiselwanga.
- Umlingwa ulindeleke ukuba aphenhule imibuzo ebuzwe kuyo **nayiphi** na imibongo okanye naziphi na izibongo ezimiselweyo; KUNYE nombuzo omnye kwimibongo okanye izibongo ezingamiselwanga.

**QAPHELA:** Umbuzo ongombongo ongamiselwanga KUNYANZELEKILE ukuba uwuphendule. Qinisekisa ukuba ukhethe imibuzo emiTHATHU kweli candelo.

**Ubude bombuzo omde buphakathi kwama-190 nama- 240 amagama.**

**UMBUZO 1 (UMBUZO OMDE)**

Fundisisa esi sicutshulwa silandelayo sombongo, wandule uchaze okuphuhliswa zizixhobo zolwimi ezikhankanywe ngasezantsi ukuphuhlisa intsingiselo. Phendula ngolu hlobo lulandelayo:

- Izafoke
- Uphinda-phindo
- Izibayiyiyo

**A! ZILIMBOLA – M Mbambo**

- |    |   |
|----|---|
| 1  | A! Zilimbola!                                 |
| 2  | Umntwan' oyinkwenkwe yindoda,                 |
| 3  | Yintandane kowabo emaThileni.                 |
| 4  | Ziyaqhayisa ngay' ezakowab'iintombi.          |
| 5  | Nonin' uzingomb' isifuba ngaye.               |
| 6  | Sakukhul' isithombo kulibhong' emzini.        |
| 7  | Yintlutha esizweni nasengqondweni.            |
| 8  | Ngundize kubantwana ekuhlaleni.               |
| 9  | Nkosi yam namhla kungawe ke,                  |
| 10 | Choko-choko elimabalabala eGwali,             |
| 11 | Mbishiza lamahlath' aseGwali,                 |
| 12 | Ntambanan' emaphiko etyityimb' emafini,       |
| 13 | Sondel 'esibhakabhakeni ikhaya leenkwenkwezi- |
| 14 | A! Zilimbola!                                 |

- 15 A! Zilimbola!  
 16 Yinkcalankcala inkunz' aseGwali,  
 17 Umjezula kakuhle gqitha ngeliso,  
 18 Ngomlomo le nkunzi iyabhodla,  
 19 Ibhodl' iintshwembenxa zamagama,  
 20 Itsho ngezibhebhwela uncuthu.  
 21 Ciko lokuncokola, ciko lokuvuma-  
 22 Mv'evum' engaziwayo ingoma.  
 23 Nkunz'inomcondo yaseGwali-  
 24 Mabandl' akuloPhuthise nivile na?  
 25 Nditsho kuni mabandl'aseGwali.  
 26 MaGwal' akuloPhuthise nibonile na  
 27 Ukusombuluka kwenamba kowayo?  
 28 Isilo esimzila sibonwa koomaFort Hare-  
 29 KoomaKapa koomaRhowudzi siboniwe.
- 30 Nditsho kuni maGwal' akuloPhuthise.  
 31 Int'engqond' inamendu okwesikhotsholo-  
 32 Nkalatya yephakathi ngexesha layo-  
 33 Iphakatha kakuhle kowayo kwaRharhabe-  
 34 Ingumagxa akaxhali ngezobuRharhabe.  
 35 Yingqawa enqwenela abantu-  
 36 Ingqawa abantu namaphakathi-  
 37 Ingqawela amaphakathi neenkosi.  
 38 Buzani kuNkos' uPhani Busoshe,  
 39 Le nyaniso uyayazi yaye uyayingqina.

[10]

**OKANYE****UMBUZO 2 (UMBUZO OMFUTSHANE)**

Fundisisa lo mbongo ungezantsi uze uphendule imibuzo elandelayo.

**... – FM Shoba**

- 1 Ngumfo ozwabulukayo.  
 2 Iliso lakhe libukhali.  
 3 Uyaphuthelwa xa kukho  
 4 Ezizezakhe ezithe shwaka.
- 5 Ekhaya limi izwi lakhe.  
 6 Uhlonitshiwe lusatshana.  
 7 Unothando kwinkosikazi.  
 8 Nanko ekrozile nowakwakhe  
 9 Ukusinga apho kuphilwa khona.  
 10 Xa amadoda etshona ebhekileni  
 11 Akayilibali imazi yakhe,  
 12 Irhabula ithamo lomyeni.



- |    |                                     |
|----|-------------------------------------|
| 13 | Yindoda equmbi kwintlanganiso.      |
| 14 | Ayityhulubi, iyazikisa ukucinga.    |
| 15 | Yobayeka bakrutha-kruthane,         |
| 16 | Suke itsho ngoluvo ukuphucuka.      |
| 17 | Ayizibandezi kwabarhawuzelelwa      |
| 18 | Ngamakhwapha beziingqeqe.           |
| 19 | <u>Sisiziba</u> ukuthula nobunzulu, |
| 20 | Indoda yomXhosa.                    |

**IMIBUZO**

- 2.1 Nika isihloko salo mbongo ungasentla. (1)
- 2.2 Shwankathela umongo walo mbongo ngesivakalisi ESINYE. (2)
- 2.3 Chonga umgca ongqina intetho nganye kwezi zingezantsi ukusuka kumgca wesi-5 ukuya kumgca we-15.
- 2.3.1 Xa uyintloko yekhaya ayinakuguqulwa into oyithethileyo. (1)
- 2.3.2 Umntu odla amathambo entloko. (1)
- 2.4 Ingaba igama 'ekrozile' kumgca wesi-8 lityhila umfanekiso-ngqondweni wabantu abahamba njani? (1)
- 2.5 Nika intsingiselo yomgca we-9, kwisitanza sesibini. (1)
- 2.6 Xa kusithiwa 'Ayizibandezi kwabarhawuzelelwa ngamakhwapha beziingqeqe' kuthethwa ukuba:
- A Utyiwa yinto ekhwapheni.
- B Ungumntu ongawonqeniyo umlo kwabo baqala umlo bengazi kuwufeza.
- C Unukisela abo badelekileyo bebafutshane ngesithomo ngamakhwapha. (1)
- 2.7 Xela uhlobo lwesafobe esikrwelelweyo kumgca we-19 uze uchaze ukuba siphuhlisa ntoni. (2)
- [10]**

**OKANYE**

**UMBUZO 3 (UMBUZO OMFUTSHANE)**

Fundisisa esi sicutshulwa singezantsi uze uphendule imibuzo elandelayo.

**UKHANYO – C Nqakula**

- 1 Kwangaphambili saxeelwa ngoKhanyo ngu-Isake
- 2 Wathi ukumbiza nguMesaya,
- 3 Wathi iya kuba nguMthetheli woXolo,
- 4 Ngaye kwakuza kuthethwa imihla nezolo,
- 5 Kuba Lo yayinguMesaya, uMsindisi.
- 6 Yabiz' inkwenkwezi eMpumalanga,
- 7 Yaqaqamba okwemitha yelanga;
- 8 Zakhawuleza zayilandela izazi
- 9 Kuba ngalo nkwenkwezi zazisazi,
- 10 Zityhilelwe ngokuzalwa koMsindisi.
- 11 Le nkwenkwezi yayibonisa ukhanyo olunjengelanga,
- 12 Olwaluza kuzivelela zonke iintlanga,
- 13 Luzikhanyisele zonke iimbombo zomhlaba,
- 14 Kungabikho sizukulwana singalwaziyo olu daba
- 15 Lokuzalwa koThixo Oligorha, uMsindisi.
- 16 Ngokhanyo abantu bazi lukhulu ngoThix' ophilayo,
- 17 Baba baninzi abaguqukayo bacutheka abaphikayo.
- 18 Kuba nabo beyibona imimangaliso
- 19 UKhanyo awayeyenza, iyidela impikiso,
- 20 Iphila ngezwi imilwelwe.
- 21 Ngubani namhlanje ohleli ebumnyameni?
- 22 Ngubani namhlanje osafukame ebudengeni?
- 23 Ngubani na ongamaziyo uYehova wemiKhosi?
- 24 Ezo zimfundiso zeZeZulu iHlosi,
- 25 UYesu Krestu uMsindisi.

**IMIBUZO**

- 3.1 Ngubani lo Khanyo kuthethwa ngaye? (1)
- 3.2 Yeyiphi inkolo efumaneka kwesi sicutshulwa singasentla? (1)
- 3.3 Nika udidi lwesafobe esikrwelelwe umgca ngaphantsi kwisitanga sesi-2 wandule ukuchaza ukuba siphuhlisa ntoni ngokwesicutshulwa. (2)
- 3.4 Nika intsingiselo yesitanga sesine kwesi sicutshulwa. (2)
- 3.5 Chonga umgca obonisa uchasano kwisitanga sesi-4. (1)



3.6 Isixhobo esisetyenziswe ngumbhali esibonisa ukuqala kwemigca emithathu elandelayo ngokufanayo:

- 21 Ngubani namhlanje ohleli ebumnyameni?  
 22 Ngubani namhlanje osafukame ebudengeni?  
 23 Ngubani na ongamaziyo uYehova wemiKhosi?

Kuthiwa:

- A Yimvano-siphelo.  
 B Yimvano- siqalo.  
 C Yimfano-zandi.

(1)

3.7 Ukoluphi udidi lo mbongo ukhankanywe ngasentla? Xhasa impendulo oyinikileyo.

(2)

[10]

### OKANYE

#### UMBUZO 4 (UMBUZO OMFUTSHANE)

Fundisisa esi sicutshulwa singezantsi uze uphendule imibuzo elandelayo.

#### IMFUNDO – N Shasha

- 1 Imfundo sisixhobo sobomi  
 2 Liqul' elingazanga loma nanini  
 3 Ngumlambo onzulu ozel' indyebo  
 4 Sisibane esikhulu esisus' ubumnyama  
 5 Ndiyayithand' imfundo kub' izis' ukhanyo  
 6 Inkubeko izalwa yimfundo  
 7 Kunamhla sith' izandla ziyahlambana  
 8 Sihlamban' imihlana sicheban' iinduma  
 9 Sicumz' ubundlobongela sixhag' uthando  
 10 Sixabisene, siyimbumba yamanyama  
 11 Namhlanj' umhlab' uhlangene!  
 12 Ithol' elimfusa likaNosekeni noGadla liyasibiza  
 13 Lith' i-Afrika ibuyile, masakhane!  
 14 Lith' ibhulorho yokuwel' imifula yimfundo  
 15 Vukani ma-Afrika niyilande nixhage imfundo  
 16 Ncincilili !!!

#### IMIBUZO

4.1 Khetha intsingiselo echanekileyo yomgca othi, 'Imfundo sisixhobo sobomi' kwisitanza sokuqala, kwezi zilandelayo:

- A Ubomi bunzima ngaphandle kwemfundo.  
 B Imfundo iyingozi ebomini.  
 C Imfundo yinto yokukunceda ukufezekisa iminqweno yakho ebomini.

(1)



- 4.2 Chonga umgca obonisa ukuba imfundo ayipheli, ihlala ikho ngalo lonke ixesha. (1)
- 4.3 Xela udidi lwesafobe esikrwelelwe umgca ngaphantsi kwisitanza soku-1. (1)
- 4.4 Yintoni eziswa yimfundo ngokwesitanza soku-1? (1)
- 4.5 Imvano-siqalo ka-Si- kumgca wesi-8 ukuya kowe-10 isetyenziswe ngayiphi injongo kwisitanza sesi-2? (2)
- 4.6 Ngumfanekiso-ngqondweni wantoni ofumaneka kwibinzana 'sicumz'ubundlobongela' kumgca wesi-9? (1)
- 4.7 Yintoni injongo yombhali ngokusebenzisa ushiyo lwezikhamiso kumgca we-13 nowe-14? (2)
- 4.8 Igama 'Ncincilili!!!' lityhila ntoni ngokwendawo elikuyo kwisicatshulwa? (1)

**[10]****KUNYE****UMBUZO 5 (UMBUZO OMDE)**

Fundisisa lo mbongo ungezantsi uze ucacise intsingiselo yawo usebenzisa awakho amazwi. Bhala phantsi kwesihloko esithi: *Intsingiselo yombongo*.

**Aa! XOLILIZWE! – SS Mema**

- 1 Hamba Xolilizwe asimi ngaphambili!
- 2 Xa uluvile ubizo duna likaPhalo siyakukhulula
- 3 Indima enomkhitha kambe uyizamile!
- 4 Amadlakadlaka akowethu nawo uwaxolile.
- 5 Nyukela ngasentla ngonyam' emdaka yakuloTshiwo,
- 6 Ngqukuv' ematyhoboza, nkunz' emnyama kuloSarhili.
- 7 Ubungumntu kwaGcaleka naselizweni jikelele!
- 8 Usigqume imihlana wasambathisa neempundu.
- 9 Kambe ngobomi bakho kophila isizwe nelizwe,
- 10 Atheth'amathambo akho nox'ulele kobandayo
- 11 Asikhombise kuQamata apho ujonge khona!
- 12 Kwande uxolo nemvisiswano ezweni lakowethu.
- 13 Huntshu! mzukulwana kaHintsa siyakubhotisa;
- 14 Ngedini lesizwe elinguwe icamagu livumile!

**[10]****OKANYE**

**UMBUZO 6 (UMBUZO OMFUTSHANE)**

Fundisisa lo mbongo ungezantsi uze uphendule imibuzo elandelayo.

**ITHEMBA – HE Fihla**

- |   |                                 |
|---|---------------------------------|
| 1 | Ithemba lingumsimbithi,         |
| 2 | Lomelele ngokwentsimbi,         |
| 3 | Liqine ngokwesinyithi           |
| 4 | Nqwa nomth'ekuthiwa ngumthathi. |
| 5 | Apho likhona ithemba,           |
| 6 | Lukhona uloyiso,                |
| 7 | Kuba ludala amandla,            |
| 8 | Kuphel'ukuthandabuza.           |

6.1 Kwisitanza sokuqala, umgca wokuqala kuthiwa 'ithemba lingumsimbithi'. Nika intsingiselo yentsusa yegama 'umsimbithi'. (1)

6.2 Kwisitanza sokuqala le migca ilandelayo iphela ngokufanayo:

- |   |                         |
|---|-------------------------|
| 1 | Ithemba lingumsimbithi, |
| 3 | Liqine ngokwesinyithi   |

Oku kufana kubizwa ngokuba yi ...

- |   |                |     |
|---|----------------|-----|
| A | mvano- magama. |     |
| B | mvano-siqalo.  |     |
| C | mvano-siphelo. | (1) |

6.3 Cacisa ukuba umbhali uthetha ukuthini xa esithi 'ithemba lomelele ngokwentsimbi' (kwisitanza sokuqala.) (2)

6.4 Safobe sini igama 'ngokwesinyithi' elikumgca wesi-3, kwisitanza sokuqala? (1)

6.5 Isifanekisozwi u 'Nqwa' kumgca wesi-4 siphuhlisa ntoni ngethemba? (2)

6.6 Xa ufunda umgca wesi-5 nowesi-6, ungathi ithemba linxulunyaniswa nantoni? (1)

6.7 Nika ingxam yokuqulethwe sisitanza sesibini ngezivakalisi EZIBINI, usebenzise awakho amagama. (2)  
**[10]**

**AMANQAKU ECANDELO A: 30**

**ICANDELO B: INOVELI****IMIYALELO**

- Kweli candelo kubuzwe iinovelI ezimbini.
- Khetha imibuzo kwinoveli **oyifundisiweyo**.
- KwiNoveli **NGANYE** kubuzwe imibuzo emi**BINI**, **OMDE NOMBULO** **OMFUTSHANE**, ukususela kumbuzo **7** ukuya kumbuzo **10**.
- Khetha umbuzo ube mNYE uwuphendule.

**QAPHELA:** Ukuba umlingwa ukhethe umbuzo **OMDE** kwinoveli ayifundisiweyo; **kunyanzelekile** ukuba akhethe umbuzo omfutshane kwiCandelo C. Ukuba ukhethe umbuzo omfutshane kwiCandelo B (kwinoveli) **kunyanzelekile** ukuba akhethe umbuzo **OMDE** kwiCandelo C.

**Ubude bombuzo OMDE buphakathi kwama-340 nama-390 amagama.**

**UMBUZO 7 (UMBUZO OMDE)**

***NYANA WAM! NYANA WAM! – WK Tamsanqa***

Funda esi sicutshulwa silandelayo uze uphendule imibuzo engezantsi.

Kule noveli ifuthe lenkolo yobuKrestu litshotsh'entla. Oku kungqinwa ziingcinga, ziintetho nezenzo zomlinganiswa oyintloko, onguThole. Chankcatha kwezi ngongoma zilandelayo:

- lingcinga zikaThole
- lintetho zakhe
- lizenzo zakhe

**[25]****OKANYE**

**UMBUZO 8 (UMBUZO OMFUTSHANE)****NYANA WAM! NYANA WAM! –WK Tamsanqa**

Funda esi sicutshulwa silandelayo uze uphendule imibuzo engezantsi.

**ISICATSHULWA 1**

Waphela unyaka zabe sezivalwa izikolo, zigqityiwe neemviwo. Ngalo holidi uMangaliso wayezimisele ukuya eRhawutini efuna ukuya kubona uThozama kuba kunyaka olandelayo wayezimisele ukusebenza, kodwa, ngelishwa okanye ngethamsanqa waba ngomnye wabafundi abonyulwa ukuba aye kwingqungquthela yabafundi eNgilane. Njengoko sesikhe satsho, uhambo olo lwaluza kuthatyathwa kwasekuqaleni kwenyanga yoMnga. Okunene kwaba njalo, into ke leyo eyenza ukuba makathi nje ephuma uMangaliso kwaSomgxada ekubeni zigqityiwe iimviwo abe eba yindlela esinga eKapa apho kwakuza kukhwelelwa khona inqanawe esinga eNgilane. Wafika sel'elindelwe, bavuya kakhulu abafundi abamhlophe akufika, bavakala besithi, "ukho nje ke ngoku sihlobo, i-Afrika esezantsi iphelele." Okunene ke kwakhwelwa ngosuku olulandelayo loo nqanawekazi inkulu kuthiwa yi-Union Castle.

Asingebalisi nto kakhulu ngohambo elwandle ngaphandle nje kokuba lwakha lwamkhathaza kakhulu ulwandle ngeentsuku ezimbini zokuqala, lumkhuphisa, phofu yabuya yaphela loo nto kungentsuku zingaphi. 'Nto angazange ayilibale bubukhulu benqanawa awathi wafumanisa ukuba ngumzi wonke uphelele, alapho amakhitshi, zilapho izindlu zokutyela, alapho amagumbi ngamagumbi okulala, kwade kwakho namabala emidlalo kudlalwa intenetya, omnye wemidlalo awayeyithanda kakhulu nawathi wazibalula ngobuncutshe kuyo phakathi kwamakhwenkwe aMhlophe kolo hambo. Yahamba inqanawa elwandle belala bevuka ishumi elinesihlanu lonke leentsuku kwala kolweshumi elinesithandathu yangena kunxweme lwaseSouthampton eNgilane.

Bathi befika elunxwemeni kwaye sekunyakazela ngabafundi ababezokubahlangabeza, iyintlocoma kukhala amaxilongo kuvunywa iintlobo-ntlobo zeengoma, zilapho iingoma ezithandwa kakhulu ngamaNgesi, *Rule Britania* kunye no-*God save the King* wawo. Kuwo onke amaqela awayelapho evela kumaziko ngamaziko emfundo alo lonke elo laseNgilane, emana ukunikana iziqabu ngeengoma elona lathi lamxhuzula umxhelo kakhulu liqela lase-Oxford University ekwakusithiwa yi-O.C.C. (*Oxford Christian Club*), elalivuma ngamaxilongo liphethelwe ngumfana owayebetha kakhulu ikhodiyan, libalasele ngeculo elithi, *The Gospel bells are ringing*. Bathi ukuba baphelele ukuhla enqanaweni bathathwa basiwa e-Oxford University apho yayiza kubanjelwa khona ingqungquthela. Bafika sekuzele apho ngabafundi bevela kwiindawo ngeendawo, belapho abavela koomaChina, Indiya, Jamani, Melika, Canada, Itali, kwaSirayeli, Jiphutha nakumaNtla e-Afrika njalo-njalo. Emva kweziphungo basiwa eholweni apho abafundi abambalwa basemaNgesini benza intetho emfutshane bebamkela besithi, "Yonwabani kusekhaya nalapha." Emva koko babiwa besisiwa kwiindawo ababeza kuhlala kuzo ngezo ntsuku zengqungquthela, njengoko yayiza kuqala kusuku lwesithathu befikile, banikwa iintsuku ezimbini ukuba bakhe baphumle.

Emva kweentsuku zokuphumla yaqala ingqungquthela, azibalula amakhwenkwe eendawo ngeendawo kwimibandela ngemibandela. Belapho abanyulelwa ukuxoxa ngezombuso, belapho abamele ezoqoqosho, belapho abezobugqi, belapho abezonqulo. UMangaliso yena wathabatha inxaxheba kwimibandela emibini, kwezobuzwe nezonqulo, kwaxhelw'eXhukwana ke kumfo omkhulu kuba wayenolwazi oluphangaleleyo kule mibandela yomibini, watsho bee ng'a imilomo bonke ababekuloo ngqungquthela bemamele ethetha.

## IMIBUZO

- 8.1 Ngokwesicatshulwa yiyiphi inyanga awayeza kuthabatha ngayo uhambo uThole? (1)
- 8.2 Laliyintoni ikhonkco lonxibelelwano phakathi kukaThozama noMangaliso? (1)
- 8.3 Nika igama leziko lemfundo ephakamileyo elibizwa ngokuba kukwaSomgxada. (1)
- 8.4 Chonga intetho echanekileyo eyathethwa ngabafundi abaMhlophe kuMangaliso ukufika kwakhe kubo eKapa.
- A "Ukho nje ke ngoku sihlobo, i-Afrika esezantsi iphelele."  
 B "Ukho nje ke ngoku sihlobo, uMzantsi Afrika wonwabile."  
 C "Ukho nje ke ngoku sihlobo, uMzantsi Afrika ufikile." (1)
- 8.5 Nika igama lenqanawekazi ababekhwele kuyo abafundi ukusinga eNgilane. (1)
- 8.6 Kwenzeka ntoni kuMangaliso eyabonakalisa ukuba ulwandle alumphathanga kakuhle kuhambo lwabo? (1)
- 8.7 Le nto yenzekayo kuMangaliso uyikhankanye ku-8.6 yathatha iintsuku ezingaphi? (1)
- 8.8 Zinto zini ezazisenqanaweni ezamenza angabulibali ubukhulu bayo? Bhala ibe NYE. (1)
- 8.9 Nguwuphi umdlalo awazibalula kuwo ngobuncutshe kolo hambo lwabo? (1)
- 8.10 Lwathatha iintsuku ezingaphi uhambo lwabo olusinga eNgilane? (1)
- 8.11 Nika igama lonxweme abafikela kulo eNgilane. (1)
- 8.12 Xela iingoma EZIMBINI ezithandwa kakhulu ngamaNgesi ezazivunywa eNgilane xa kwakuvuyiswana nokufika kweli qela laseMzantsi Afrika. (2)
- 8.13 Iqela lase-Oxford University ekuthiwa yi-Oxford Christian Club, lalricula eliphi iculo? (1)
- 8.14 Yiyiphi imibandela emiBINI awayeza kuxoxa ngayo uMangaliso, kwemine ekwakuza kuxoxwa ngayo? (2)

Funda esi sicutshulwa silandelayo uze uphendule imibuzo engezantsi.

## ISICATSHULWA 2

'Ndeva ilizwi leNkosi, lisithi, ndothuma bani na? Ngubani na owosiyela? Ndathi, Ndikho, thuma mna.'

Lwafika usuku lweSinodi yamaWesile. Lwafika uMangaliso enentaphane yeencwadi zivela kwiindawo ngeendawo zimmema ukuba ayokuba ngumfundisi kuzo. Kuthe kwakufikwa kumbandela wolwabiwo lwabefundisi kwakhokeliswa iGeorge Goch eyayingenamfundisi ingenayo nendlu yecawe ngelo xesha. Akungaba kumaxesha angaphambili le ndawo yaseGeorge Goch yayingabelwa befundisi, yayisabelwa koko ibaginya. Ihlala nje le Sinodi kwakuse kutshone isithathu sonke sabefundisi, isibini sathi sakufika seyela kwiziyolo zayo saba siphelela ekusikweni. Owesithathu wathi akubona ukuba ungxamele ukutshona akalinda ukuba ade asikwe wazirhoxisa ebufundisini. Ngenxa yezi zizathu, le ndawo yaba ngundaba-mlonyeni akwabikho namnye umfundisi onqwenela ukuya kuyo. Lathi ukuba likhankanywe igama layo saqubuda sonke isifundisi kungekho unqwenela ukunga angasiwa kuyo. Kwakhankanywa amagama amabini kubefundisi babhebhetha abaqhelisela, kunjalo kwacaca ukuba bakuxolelele nokusikwa ebufundisini kunokuba bangaya eGeorge Goch.

"Nicinga ntoni na ngeGeorge Goch madoda?" wamana ebuza esitsho usihlalo weSinodi. Aqubuda amadoda. Ndithetha mna ngeengwevu zabefundisi kwakungekho yayinqwenela ukunga ingathunyelwa eGeorge Goch. Wayibukela le nto uMangaliso, wakhumbula amazwi eentokazi awakha waziva zincokola kuloliwe kudala engekabi nguye nomfundisi, zincokola ngeentlobo zotywala ezisilwa kule lokishi, izikhwikhwikhi, iziqeda-veki, oontaba-zosizi, waqonda ukuba bafanele abefundisi ukuyoyika le ndawo. Kuthe kolo cwaka equbudile amadoda wabonakala ephakama uMangaliso esithi, "Nyulani mna ndiye eGeorge Goch."

Wathi ukuba atsho sabonakala sisothuka sonke isifundisi simjonga. "Kodwa mfundisi uyayazi le George Goch kuthethwa ngayo?" wabuza owayesesihlalweni. "Ndingayazi nje bawo ndinqwenela ukuba nindithumele kuyo," watsho ukuphendula uMangaliso. "Akuyi lubuyayo apho mfo wam, kukwazembe leyela nomphini," yatsho enye ingwevu yomfundisi esidlangalaleni. Into yokuzinikela kukaMangaliso ukuba athunyelwe eGeorge Goch yathanda ukuvusa ingxoxo enkulu kubefundisi, uninzi luyichasa mpela phantsi kwezizathu ezithi indawo enjengeGeorge Goch ayifuni mfundisi usemncinci unokuthi ahendeke lula ziziyolo zelizwe, ifuna umfundisi osel'eqinile. Ngaphezulu akungelungi ukuba umfundisi obaluleke njengoMangaliso nofunde kangako athunyelwe kwindawo ephantsi olo hlobo, engekabi nayo nendlu yecawa, noko icawa yaseWesile ingathelwa nqa luluntu lonke luphela ngesenzo esinjalo.

## IMIBUZO

- 8.15 Wayekhonza kweliphi ibandla uMangaliso? (1)
- 8.16 Sizathu sini esasibangela ukuba abefundisi bangahlali kweli bandla? (1)

- 8.17 Wonyulwa ngubani uMangaliso ukuba abe ngumfundisi waseSpes Bona, kuba kutheni? (2)
- 8.18 Yayithetha ukuthini enye ingwevu yomfundisi xa isithi, "eGeorge Goch kukwazembe leyela nomphini"? (2)
- 8.19 Zinto zini ezaziyimiceli-mngeni kuMangaliso njengomfundisi omtsha waseGeorge Goch? Nika zibe MBINI. (2)
- 8.20 Ngexesha uMangaliso esebenza kwibandla laseGeorge Goch, ngubani athi wadibana naye emva kweminyaka balahlekana? (1)  
[25]

**OKANYE****UMBUZO 9 (UMBUZO OMDE)****UKHOZI OLUMAPHIKO – N Saule**

Zininzi izinto athe wahlangabezana nazo uMfazwe kuhambo lwakhe ukuwela imida mhla wasuka eMhlabiso esiya kwinkampu yeNtsimbi'ebomvu. Chaza imiceli-mngeni aye wajongana nayo kwezi ndawo zilandelayo neendlela athe wazikhupha ngazo kuyo. Bhala ngokwezi zihloko:

- EThongo
- EMgazi enkampini yeNtsimb'ebomvu
- lindlela athe wazikhupha ngazo kule miceli-mngeni

[25]

**OKANYE****UMBUZO 10 (UMBUZO OMFUTSHANE)****UKHOZI OLUMAPHIKO – N Saule**

Funda esi sicutshulwa silandelayo uze uphendule imibuzo engezantsi.

**ISICATSHULWA 1**

Ndithe xa ndithi cakatha ebaleni ndikhusele intloko ngegخالaba, ndeva isandla esibandayo sindithi hlasi apha esihlahleni. Andixhuzulanga noko, ndajika ndabheka. Ndingekaqondi ukuba kwenzeka ntoni na, ndangqutywa ngaphambili ndibuyiswa umva, andaxhathisa. Yayingabaya babini besikolo. Bandidudulela ecaleni bengathethi, sada saya kujikela ngaphaya kwegumbi elinomlilo ngaselucingweni.

"Mfundisi usengozini." Yatsho le ibindithe chu ngesihlahla intwana xa kanye ndiza kubuza ukuba ndisiwa phi na.

"Ingozi yantoni? " Ndibuze sendindwebe okwentwala yesikhakha.

"Ixesha lokuchaza liya kube libekho, kodwa okwangoku mka kule ndawo."





"Ndimke ndiye phi na madoda?"

"Indawo e 'safe' Mfundisi, kukwaMfundisi uHlathi."

Ndaqonda ukuba kunyembelekele, ndathi lakatyu ngaphaya kocingo, ndanqumla eyadini yabammelwane senditsale ibhatyana yam ndagquma intloko. Ndibe ngathi ndifakelwe amavili ukuhla umgaqo, ndathatha iindlela ezigwegwelezayo, ndagcampuza emanzini ndada ndaya kufika kwamfundisi.

## IMIBUZO

- 10.1 Nika amagama abafundi ABABINI ababezama ukukhusela utitshala wabo. (2)
- 10.2 Xela igama lesikolo awayefundisa kuso utitshala. (1)
- 10.3 Yeyiphi le ngozi akuyo utitshala? (1)
- 10.4 Yintoni ehlanganise esi sithathu kule ndawo sikuyo? (1)
- 10.5 Ngubani igama likatitshala ekuthethwa naye apha? (1)
- 10.6 Yintoni ebangele ukuba utitshala azingelwe kangaka? (1)
- 10.7 Xa wayesengozini uMfazwe bathi abafundi makahambe aye phi apho kukho indawo 'esafe'? (1)
- 10.8 Ingaba ngokolwazi lwakho lwebali utitshala wayeyimpimpi? Xhasa impendulo yakho. (2)
- 10.9 Ingaba ukusetyenziswa kwezifanekisozwi, u-hlasi no-chu zinika umfanekiso-ngqondweni wantoni ngokwakusenzeka kule ndawo? (2)
- 10.10 Sizathu sini esabangela ukuba utitshala azigqume intloko ngebhatyi ngeli xa wayebaleka 'ingozi'? (1)

Funda esi sicutshulwa silandelayo uze uphendule imibuzo engezantsi.

## ISICATSHULWA 2

USiphiwo ufikela kum apha eMthontsi akuba ethubeleze ngempumelelo yena ukuwela imida, eshiya emva ekhaya kuqhuma uthuli, abantu besithi ukuba umbuso wocalucalulo awugobi, baza kuwaphula uphondo ngezandla. Wafika wandibalisela yonke into, ethathela apho ndandigqibele khona. Sakuba sihlange emva kokuba eqhelisiwe enkampini, into yokuqala endambuza yona ngabazali bam.

"Mfundisi, andizi kukuxokisela, akuzange kulunge nto. Ixhego alizange lithathe thuba lide etrongweni, lalala alavuka. Yingxelo yamapolisa leyo. Ixhegokazi lona ndiyabona alizange likwazi ukumelana nomothuko, nalo lalandela kancinci nje emva kweveki, yintliziyo." Njengokuba kusithiwa indoda ayilili iyangqukruleka, kum zehla ngezidlele iinyembezi. Kwandithatha ixesha elide phambi kokuba ndimbuze ezinye izinto zasekhaya uSiphiwo.

**IMIBUZO**

- 10.11 Ngubani lo uza nodaba lokusweleka kwabazali bakaMfazwe? (1)
- 10.12 Wasweleka njani uyise kaMfazwe entolongweni? (1)
- 10.13 Sigulo sini esabulala unina kaMfazwe ngokwesicatshulwa ? (1)
- 10.14 Ibinza elithi, '... indoda ayilili iyangqukruleka' lithetha ukuthini? (2)
- 10.15 Chonga ibinza elibonisa ukuba uMfazwe weva ubuhlungu ngokusweleka kwabazali bakhe. (1)
- 10.16 Ifuthe lomzabalazo limshiye uMfazwe elahlekelwe zizinto zini? Nika zibe MBINI. (2)
- 10.17 Kwidabi ababekulo abo babesemfazweni ayibanga lidabi lezigalo kuphela. Xhasa olu luvo uxele izinto eziMBINI ezakhayo ezazisenziwa. (2)
- 10.18 Ingaba lo mzabalazo kuthethwa ngawo kule ncwadi waba yimpumelelo okanye waba lilize? Xhasa impendulo oyinikileyo. (2)
- [25]**

**AMANQAKU ECANDELO B: 25**

**ICANDELO C: IDRAMA****IMIYALELO**

- Kweli candelo kubuzwe imibuzo kwiidrama ezimbini, ukususela kumbuzo **11** ukuya kumbuzo **14**.
- Kwidrama nga**NYE** kubuzwe imibuzo emibini; **omde** kunye **nomfutshane**.
- Khetha umbuzo ube **mnye** kwidrama **oyifundisiweyo**.

**KHUMBULA:** Ukuba umlingwa ebekhethe umbuzo omfutshane kwiCANDELO B; **UNYANZELEKILE** ukuba akhethe umbuzo **omde** kwiCANDELO C.  
Ukuba umlingwa ebekhethe umbuzo **omde** kwiCANDELO B; **UNYANZELEKILE** ukuba akhethe umbuzo omfutshane kwiCANDELO C.

**Ubude bombuzo omde buphakathi kwama-340 nama-390 amagama.**

**UMBUZO 11 (UMBUZO OMDE)****AMAZA – ZS Qangule**

Iziganeko ezikule ncwadi zijikeleze uNamhla ongumlinganiswa oyintloko. Phonononga lo mdlalo uxhase olu luvo phantsi kwezi zihloko:

- Umtshato kaNamhla
- Imikhuba kaNamhla emzini
- Imizamo yokumhlangula neziphumo zayo

**[25]****OKANYE****UMBUZO 12 (UMBUZO OMFUTSHANE)**

Funda esi sicutshulwa singezantsi uze uphendule imibuzo elandelayo.

Namhla: (*Esakheleka ngumsindo*)  
Ungandityisa amafityofityo ndibe likiyokiyo; ungandinxibisa ubunewunewu ndibe yipikoko, ungandifunela izicaka, zibe zizihlewe, ungandipha isidwadwalala somhlaba, ungawubiyela lo mzi ube yinqaba, ukuba akundithandi ndifana nesikhova ehlathini, ndilixhwitha-ntamo, ndingumhlolokazi, ndiphelelwe, ndiphefumla ngamanxeba.  
(*Uzimbola –mbola phantsi uNamhla, ukhala esikrakra*)

Sidima: (*Emfunqula, embeka phezu kwebhedl*)  
Khawuzole Namhla.

Namhla: Ndizolele ntoni?

Sidima: Khe kudlule ixesha.

Namhla: Ixesha liza kudlula nantoni?

Sidima: Ngumhlobo osombulula amaqhina, ixesha liyeza elipholisa amanxeba.

Namhla: (*Etsiba ebhedini, bejjisana*)  
Ucikoza kanye oku kukaSathana.

Sidima: Akanasimilo kanene lo mntwana!

Namhla: Ndiyeke! Suka kum! Nja! Nja! (*Uwe umkhusane*)

### IMIBUZO

- 12.1 Sele esakheleka ngumsindo nje uNamhla, ubangelwa yintoni? (1)
- 12.2 Le mpendulo uyinike ngasentla inafuthe lini kumtshato kaNamhla? (2)
- 12.3 Chonga igama elichaza abantu abaninzi nelichaza umfazi oswelekelwe yindoda kwintetho kaNamhla yokuqala kwisicatshulwa esingasentla. (2)
- 12.4 Zingaphi iinyanga sitshatile esi sibini ngeli xesha lengxabano? (1)
- 12.5 UNamhla uthi, 'Ungandinxibisa ubunewunewu ndibe yipikoko.' Chaza ukuba uthetha ukuthini ngala mazwi. (2)
- 12.6 Cacisa intetho kaSidima ethi, "... ixesha liyeza elipholisa amanxeba." (2)
- 12.7 Ingaba isenzo sikaNamhla sokutsiba phezu kwebhedi ejijisana noSidima sinika umfanekiso-ngqondweni wantoni? (2)
- 12.8 Ingaba **yinyaniso** okanye **asiyonyaniso** ukuba uNamhla enomsindo nje kungenxa yokutshutshiswa nguLizo ukuba batshate? Zixhase. (3)
- 12.9 Ngokwasencwadini mpawu zini ezimenza uNamhla angakufaneli ukwenda? Bhala zibe MBINI. (2)
- 12.10 Ngokwesicatshulwa ingaba la magama akwizibiyeli asetyenziselwe ukuphuhlisa yiphi injongo? (1)
- (*Esakheleka ngumsindo*)  
(*Emfunqula, embeka phezu kwebhedi*)
- 12.11 Igama 'umhlolokazi' ngokwesicatshulwa lithetha: (1)
- A Umntu olibhinqa oswelekelwe yindoda yakhe.  
B Umntu olibhinqa ondoda yakhe ethe phithi kukuthandana nomnye  
C umntu.  
Umntu olibhinqa ondoda yakhe itshate nomnye umntu.
- 12.12 Yintoni elambathayo kumtshato wabo ngokukaNamhla? Xhasa impendulo yakho ngokucaphula umgca kwisicatshulwa obonisa oku. (2)
- 12.13 Nika intsingiselo ecacileyo yentetho yokuqala kaNamhla kwesi sicutshulwa. (2)
- 12.14 "Okumanywe ngomoya wobuKrestu makungahlukaniswa bani". Ingaba uSidima nowakwakhe bawagcina la mazwi? Xhasa impendulo yakho. (2)

[25]



**UMBUZO 13 (UMBUZO OMDE)****A-a-a! JONGUMSOBOMVU! – BB Mkonto**

Umxholo wale noveli uqulethe umyalezo othile wokutshintsha kwesimo sentlalo samaXhosa, myalezo lowo unokuba necala elihle necala elibi. Phonononga le noveli uvelise icala elihle kuphela elibonakaliswe kukufika kwabefundisi eMzantsi Afrika. Bhala phantsi kwesi sihloko:

*Icala elihle elibonakaliswe kukufika kwabefundisi eMzantsi Afrika.*

**[25]****UMBUZO 14 (UMBUZO OMFUTSHANE)****A-a-a! JONGUMSOBOMVU! - BB Mkonto**

Funda esi sicutshulwa singezantsi uze uphendule imibuzo elandelayo.

**ISICATSHULWA 1**

SOGA:	Utyaphe watsho Mhlekezi. Nindibona ndilapha nje, ndize kumela uMhlekezi, A! Lwaganda!, unqandwe sisiphakathi. Singxamele ukuphunguza ngoku ngenxa yaloo mpilo yakhe. Uyaphela oku kwenkomo enesiqonga. Ke, siwela ngazibuko linye sonke kwinto yokuba leya into yona ayiyodwa, kunjalonje kuza kunyanzeleka ukuba uyithathele unyawo ngokukhawuleza Mhlekezi. Amade ngawetyala. Kuthiwe ke phaya kowenu maze ndilumane indlebe nawe ngalo mcimbi.
NEKU:	Ngxatsho ke Jwarha, ntangam. Isizwe kweli cala besisoloko singwenela ukuva ngempilo kaMhlekezi, A! Lwaganda! Siyabulela mfo kaJotelo. Nabekelwa loo nto phaya komkhulu madoda. Ubomi benkosi yethu yazini ukuba busezandleni zenu. Sivile. Kodwa ke khawundiweze kule ndawo: Senithathe manyathelo mani ukuza kuthi ga kule ndawo?
NXOKWANA:	Heke! Uhlaba kakuhle Cirha mfondini. Liphinde utsho uthi njengokuba la madoda othe inkosi eMkhubiso, nkalo zini ache azivelela? Khona, ingaba phofu inkosi yona iyithatha njani le ngulo yayo?
SOGA:	Hayi madoda! Asilolizwe eli! Utshaba lwasigqiba kunjalo nje lwasibetha ngondlela mnyama oku komntu omumathe ilitye likahili. Sikhe saya kula
NEKU:	maxoki, kodwa akasibeka ndaweni, suka abhula esela sabuya singenanto inesihlahla. Sabuya saphathelela ngokuya kuqabela
SOGA:	kwesikaMhlekezi uTyhali.
NEKU:	Kusekho gqirha livuthayo na kuloo ngingqi?
SOGA:	Kaloku uJojindaba iintambo waziphosela kunyana wakhe omncinci, ekuthiwa nguNjaziyaluma. Sabuya apho singayihlanganisi imilomo kuba umfana uyacondoba, ngathi ndijongile nje uthe chatha nakuyise lowo. Wahlabha emxholweni esaqala nje, kunjalonje akatyhola magqwirha, wasibonisa ukuba umhlola ukwabaphantsi. Nakukhumbula ukuba emva kweliya dabi laMalinde lenziwa isiko legazi, kwagqitywa.

**IMIBUZO**

- 14.1 USoga wayethetha nabani ngokwesicatshulwa? (1)
- 14.2 Ngokwasebalini ngoobani la maxoki athetha ngawo uSoga? (1)
- 14.3 Ingaba uyavuma na ukuba aba bantu ubabhale ku14.2 ngamaxoki ngenene? Xhasa impendulo yakho. (2)
- 14.4 USoga uthi, 'la maxoki abhula esela.' Cacisa ukuba uthetha ukuthini. (2)
- 14.5 Ngqamanisa la madoda neziduko zawo.

14.5.1 Soga	A Cirha
14.5.2 Neku	B Rhadebe
	C Jwarha

(2 x 1) (2)

- 14.6 UNeku uzama ukuphuhlisa ntoni ngombuzo othi, 'Kusekho gqirha livuthayo na kuloo nginqi?' (2)
- 14.7 Loluphi olu tshaba athetha ngalo uSoga? Luchaze. (2)
- 14.8 Khankanya iziganeko eziBINI ezithe zenziwa lolu tshaba. (2)
- 14.9 Babeye kwenza ntoni ooSoga kwesikaMhlekezi uTyhali? (1)
- 14.10 Ngubani unyana kaJojindaba awathi wamphosela iintambo zakhe zobugqirha? (1)
- 14.11 Unyana kaJojindaba wawukhomba phi umhlola? (1)
- 14.12 Ukuhlaba emxholweni ngokwesicatshulwa kuthetha:
- A Ukuhlaba into ngomkhonto.
- B Ukuchana into engunobangela.
- C Ukungaqiniseki ngento. (1)

**ISICATSHULWA 2**

**MNTLANE:** Ndikuva kakuhle xa usithi ninabantu apha. Naninikwe ngoobani abo bantu? Khona! Ngoobani abo Meli? Seninabantwana okanye oomolokazana ngoku? Sekutheni ngoku nivula ubuhlanti bakuthi ngezantsi nje?

**KONDILE:** Hayi tata, ubuhlanti eNxuba buvulwa kusasa buvalwe ebusuku. UMary yena ngumama omkhulu, ohlala phaya kulaa mzi (*Esalatha ixhiba likaNtlane lowo kanye*), kodwa akakwazi ukuya eNxuba. Bakho nabanye abantu abangafuni ukugwetywa ngalaa mhla mkhulu. Nani, ingakumbi wena tata, kufuneka nibaleke isihogo nalaa mlilo waso omkhulu.

MNTLANE: (*Esemsindweni*) Hini le! Ndingadibani nje nomkam, uNowayithini nin'aba? Akunazintloni zokwalatha umzi wam ekubeni senimthiye igama lokumela njengomfazi wenu? Ndanditshilo! Ingenile ke namhlanje intak' endlwini! Andisenakubiza nazinkomo zam apho kuni, mthatheni ngoku. Akasaphindi awubeke owakhe umcondo kula masango akowethu. Ubutye ngokwakhe ubufazi. Eli ggwirhakazi!

**IMIBUZO**

- 14.13 Ngoobani abantu athetha nabo uMntlane? (2)
- 14.14 Kukuthini ukuvula ubuhlanti ngezantsi ngokukaMntlane? (2)
- 14.15 Chonga umgca oqulethe isoyikiso esisetyenziswa kwabangakholwayo ngeenjongo zokuba bakholwe. (1)
- 14.16 Nika elona gama likaMeli lasemzini. (1)
- 14.17 Sizathu sini esibangela ukuba uMeli agxothwe ngumyeni wakhe? (1)
- [25]**

**AMANQAKU ECANDELO C: 25**

**AMANQAKU EWONKE: 80**